

ւորին եւ ամենայն Արեաց աւագանւոյն զերթսն Վահանայ ի դուռն, վաղվա-  
ղակի եւ ճեպով ժամ արարեալ՝ յանդիման լինէր թագաւորին եւ ամենայն Ա-  
րեաց աւագանւոյն: 3 Եւ ածեալ զմտաւ զճանապարհորդութեանն աշխա-  
տութիւն թագաւորին Վաղարշու զՄամիկոնենին Վահանայ՝ միայն ստեպ  
սիրով հարցեալ զողջոյն ուրախանայր, այլ ոչ ինչ աւելի քան զայն հարցա-  
ւեր զնա այն ար: 4 Եւ ի վաղիւն՝ ժողովեալ ամենայն աւագանի դրանն ար-  
քունի եւ այլ ամենայն բազմութիւն Արեացն՝ եւ լինէր խորան մեծ, լցեալ  
սաստիկ որերով<sup>2</sup>:

5 Սկսանէր խաւսել թագաւորն Վաղարշ ընդ Մամիկոնենին Վահանայ.  
«Լուաք, ասէ, լիով զամենայն խաւսեցեալսն ընդ Նիխորոյ, զոր ինչ պատգա-  
մաւորաւք էիր ասացեալ, եւ զոր ինչ նամակաւ, եւ զոր ինչ դէմ յանդիման<sup>3</sup>  
քո եւ նորա խաւսեցեալ էր ընդ միմեանս՝ պատմեաց մեզ. եւ ոչ էր քո ստեալ  
ի բանիցն զոր խաւսեցեալ էր՝ եւ ոչ բան մի: 6 Վասն զի Պերոզի իմ եղբարն  
անձնահաճութիւն կամացն եւ անհաւանութիւն խորհրդոյն եւ անլսողութիւն  
ուսմէք եւ ամբարտաւանութիւն<sup>4</sup> եթէ զքեզ միայն էր կորուսեալ յԱրեաց՝ թե-  
թեւ ինչ էր վնասն. ծառայ մի կորնչէիր, որում թերեւս փոխանակ գտանէր.  
բայց նա իւրով հպարտութեամբն այնչափ անթիւ բազմութիւն լաւ որերոյ  
կորոյս, որոց այսաւր փոխանակ չիք. յետոյ ապա եւ զինքն կորոյս եւ զորդիս  
իւր<sup>5</sup> եւ զկանայս: 7 Արդ՝ եթէ դո՛ւ եղեալ ես պատճառ քո կորստեանդ եւ այն-  
չափ բազմութեանն որ կորեան ընդ քո ձեռն՝ դու այսաւր հարցման արժանի  
էիր, եւ պատուհասի<sup>6</sup> եւ չարաչար մահու. բայց իբրեւ ա՛յլ է պատճառ ամե-  
նայն գործոյդ<sup>7</sup> այդմ եւ կորստեան, զոր դու գործեցեր՝ զքեզ ընդ այլոց  
բռնութեան եւ վնասու պատուհասել կարի ծանր է, եւ արեւնք մեր չիրամա-  
յն: 8 Զանզի այդ գործ, զոր դուդ կարացեր գործել՝ առ Պերոզի արհամար-  
հոտ եւ կամակոր բարուցն՝ բազումք խորհէին յԱրիս գործել, բայց չեղէն  
ձեռնհաս<sup>8</sup>. զի չկարացին զանձինս ի մահ տալ այդպէս աներկիւղ՝ որպէս  
դուքդ տտուք, քաղցր համարելով զկենցաղոյս տեսիլ. բայց դուք բնաւ առ ո-  
չինչ համարելով զայս աշխարհ՝ քաջաբար մեռան որք մեռանն, եւ եւս առա-  
ւել քաջաբար կեցայք, որ ապրեցայքդ եւ ի միջի էք: 9 Այլ երանի՛ թէ եւ այլ ո-  
րերոյն, զորս ի զուրն տարաւ կորոյս Պերոզ՝ կարացեալ էր առնել զայդպիսի

1 ՏՏ. եւ վաղիւն

2 Զ. արերով

3 Զ. զոր դէմ յանդիման

4 Ատ. անբարտաւանութիւն

5 ՏՏ. չիք իւր

6 Զ. պատուհասի

7 ԶԱտ. գործիցդ. այսպէս ըստ ուղղագրութեան ԲԳտ.

8 Զ. ձեռնահաս